

Atvinnuvega- og nýsköpunarráðuneytið
B.t. Kristjóns Þórs Júlíussonar, sjávarútvegs- og landbúnaðarráðherra
Skúlagötu 4
101 Reykjavík

Bíldudalur, 5. febrúar 2019

Efni: Athugasemdir við tillögur Vesturbyggðar að sérreglum um úthlutun byggðarkvóta fiskveiðaráranna 2018/2019

Á 861. fundi bæjarráðs Vesturbyggðar 29. janúar síðastliðinn var samþykkt tillaga um sérreglur um byggðarkvóta til fiskiskipa fyrir fiskveiðarárið 2018/2019. Í meginatriðum fela umræddar sérreglur í sér að í stað þess að úthlutun byggðarkvóta sé bundin við einstök byggðarlög, líkt og mælt er fyrir um í lögum nr. 116/2006 um stjórn fiskveiða, verði sá byggðarkvóti sem koma skal til úthlutunar í einstökum byggðarlögum í Vesturbyggð lagður saman. Öll fiskiskip sem skráð eru í sveitarfélaginu Vesturbyggð og uppfylla að öðru leyti skilyrði reglugerðar nr. 685/2018 um úthlutun byggðarkvóta til fiskiskipa á fiskveiðarárinu 2018/2019 geti svo sótt um úthlutun af því heildarmagni miðað við landaðan botnfisksafla á síðasta fiskveiðarári, þó þannig að tiltekið þak verði sett á það hversu mikið hvert og eitt fiskiskip getur fengið úthlutað.

Undirritaður er útgerðarmaður í byggðarlaginu Bíldudal. Að mati undirritaðs gengur þessi tillaga að sérreglum freklega í berhögg við það grundvallarmarkmið byggðarkvóta samkvæmt lögum nr. 116/2006 að vera til stuðnings einstökum byggðarlögum en ekki sveitarfélögum í heild auk þess sem umræddar sérreglur mundu bitna harkalega á þeim sem eiga skip skráð í byggðarlaginu Bíldudal.

Úthlutun byggðarkvóta til skipa í byggðarlaginu Bíldudal, ef miðað er við sama fjölda skipa og sótti um úthlutun á síðasta fiskveiðarári, myndi skerðast um ríflega 70% ef þessar sérreglur næðu fram að ganga og atvinnuréttindi þeirra útgerðarmanna eða útgerða sem um er að tefla skerðast með samsvarandi hætti með tilheyrandi tjóni. Með hliðsjón af nýgengnum dómum Hæstaréttar Íslands í hinum svonefndu *makrílmálum*, sbr. dóma réttarins í málum nr. 508/2017 og 509/2017, er ljóst að slík ráðstöfun með reglugerð í berhögg við gildandi lög stenst ekki og er til þess fallin að baka íslenska ríkinu bótaábyrgð.

Skip frá byggðarlaginu Bíldudal nýttu á síðasta fiskveiðarári rúm 160 tonn af þeim byggðarkvóta sem úthlutað var til byggðarlagsins. Byggðarkvótaúthlutun á yfirstandandi fiskveiðarári til Bíldudals, ásamt því sem flyst á milli ára, er 151 tonn og því augljóst að bátar frá Bíldudal geta nýtt þann kvóta á þessu ári. Öndvert við það sem fram kemur í rökstuðningi sveitarfélagsins fyrir ágæti umræddra sérreglna stuðla þær því ekki á nokkurn hátt að meiri verðmætasköpun heldur þvert á móti þar sem smábátar sem fá 15% línuvinnun landa stórum hluta þess byggðarkvóta sem kemur til úthlutunar í byggðarlaginu Bíldudal. Þá hafa sérreglurnar að mati undirritaðs aukinheldur hamlandi áhrif á frekari vinnslu í byggðarlaginu samhliða því að skerða verulega úthlutaðan kvóta sem skip frá Bíldudal nýta og færa hann til skipa í öðrum byggðarlögum.

Með vísan til framangreinds er það einlæg von undirritaðs að umrædd tillaga Vesturbyggðar að sérreglum um úthlutun byggðarkvóta í sveitarfélaginu verði ekki samþykkt. Óski ráðuneytið eftir frekari skýringum, upplýsingum eða gögnum verða þær góðfúslega veittar.

Virðingarfyllst,

Grétar Guðfinnsson